

ALIXONTO'RA SOG'UNIYNING ILMIY MEROSIGA TERAN NIGOH

Tojiboyev Muxammadrizo Dilshodbek o'g'li

Toshkent davlat sharqshunoslik

universiteti 1-kurs magistranti

ANNOTATSIYA

Mazkur maqolada ilk o'zbek marshali, Sharqiy Turkiston Jumhuriyatining Birinchi Prezidenti va raisi, Islomiy ilmlar borasida yetuk olim, shuningdek, tibbiyot bilimdoni, tarjimon, shoir Alixonto'ra Sog'uniyning ilmiy merosi haqida ma'lumot beriladi.

Kalit so'zlar: *Dorilfunun, "Tarixi Muhammadiy", "Turkiston qayg'usi", "Shifo-ul-ilal", "Devoni Sog'uniy", mutarjim.*

KIRISH

Alixonto'ra Shokirxonto'ra o'g'li (taxallusi Sog'uniy) 1885-yil 21-mart kuni, Qirg'izistonning To'qmoq shahrida o'zbek oilasida tavallud topgan. Bu insonning otalari Shokirxonto'ra asli andijonlik bo'lib, naqshbandiya tariqatiga mansub olim bo'lgan. Shokirxonto'ra xalq orasida "Shokirxo'ja eshon" nomi bilan mashhur edi. Bu inson Islom dinining muqaddas shaharlari Makka va Madinaga haj safarlarida ham bo'lgan. U o'g'illari Olimxonto'ra va Alixonto'rani o'n to'rt yoshida Hajga olib borib ziyorat qildirib, o'qish uchun Makkayu Madinaga qoldirib keldi. O'sha paytda Turkistonda ham diniy ta'lim olish uchun madrasalar yetarli edi.

Madinai munavvaradagi dorulfununlardan birida tahsil olgan Alixonto'ra qiroat, tafsir, hadis, fiqh, nahv, balog'at, mantiq, tabobat, tarix, siyrat, jug'rofiya, nazmu nasr va boshqa fanlar bo'yicha ham yetuk mutaxassis bo'lib yetishgan. Alixonto'raning

otalari nafaqat diniy bilim olish, shu bilan birga til o'rganish uchun ham o'sha yerda qoldirib kelgan, u yerda 5 yil tahsil olganlar.

Alixonto'ra Sog'unuy juda ham o'tkir so'zli, chuqur islomiy va tarixiy ilmlar, uyg'ur, arab, fors, turk tillarining bilimdoni bo'lgan.

“Tarixi Muhammadiy” asari Alixonto'ra Sog'unuy ilmiy-adabiy faoliyatining ko'p yillik mashaqqatli mehnati mahsuli hisoblanadi. Mazkur asarning yozilishi kelajak avlod ichki dunyosi qashshoqlanishining oldini olish, azaliy qadriyatlar qimmatini payg'ambarimiz Muhammad Mustafo sollallohu alayhi vasallam tarixlari bilan tanishtirish orqali saqlab qolish yo'lida qilingan buyuk mehnat mahsulidir. Bu asar Toshkentda uy qamog'ida o'tirgan paytlarida (1944-1956_yillar) yozilgan va vasiyatlariga ko'ra O'zbekiston mustaqillikka erishgandan keyin 1991 yilda farzandlari tomonidan nashrdan chiqarilgan. Unda payg'ambarimiz hayoti batafsil bayon etilgan.

MUHOKAMA VA NATIJALAR

“Bilmak kerakkim, har bir musulmon bolasi, xohi er kishi, xohi xotun kishi, xohi yosh, xohi qari, mana shu tubandagi¹ to'rt narsaning tarixini bilishi albatta lozimdur.

I. Payg'ambarimiz Muhammad alayhissalom tarixlari.

II. Qur'oni karim tarixi.

III. Dini Islom tarixi.

IV. Ka'batulloh tarixi.

“Shuning uchun, men faqir – Alixonto'ra Shokirxonto'ra o'g'li Sog'unuydurmankim, bizlardin keyingi avlod nasllarimizga va ham boshqa turkiy tillik vatandosh, din qarindoshlarimizga mendan yodgor bo'lsin deb yuqoridagi to'rt narsa

¹ quyidagi, ma'nosida.

tarixini har qandoq kishi tushungudek qilib, ochiq turkiy tilida yozdim. Bu kitobga “Tarixi Muhammadiy”, deb ot qo’ydim. Buni o’qiguvchilar faqirni duolarida yod qilib qo’yishlarini umid qilurman”².

Sermazmun hayotining oxirgi 30 yili davomida Alixonto’ra yozib qoldirgan ulkan ilmiy meros ichida “Turkiston qayg’usi” tarixiy asari alohida o’rin egallaydi. Bu asarda u kishining yigitlik va kamolotga yetgan davri xotiralari asosida o’z e’tiqodi, dunyoqarashi, qaysi g’oyalar uchun jonfido bo’lib kurashganlari, nimalarga Vatan ahlini da’vat qilganlari, suyuqli Vatanimiz tarixi saboqlari, kelajak bo’g’inlar ulardan qanday xulosalar chiqarmoqlari kerakligi, Vatanimiz mustaqilligi muqarrar ravishda qo’lga kelishi bashorati, uni mustahkamlash uchun nimalar qilmoq zarur ekani to’g’risida chuqur o’y-fikrlar o’z ifodasini topgan va bayon etilgan.

“Turkiston qayg’usi” asari 1966-1973 yillarda Toshkentda yoziladi. Bu davrda sovet mustabid tuzumi kuch-qudratga to’lgan, o’z siyosatini zo’ravonlik bilan nafaqat mamlakat ichkarisida, balki uning uzoq tashqarisida ham o’tkazib turgan payt edi. Shu sababli ko’pchilik ziyolilarimiz hukmron maslakka qattiq ishonib, kechayu kunduz uning xizmatida bo’ldilar. Qanchadan qancha yuksak qobiliyat egalari, iste’dodli shoir va yozuvchilarimiz bu soxta mafkura kuychilari, tashviqot va targ’ibotchilari edi³.

Alixonto’ra Sog’uniy umri davomida Vatanini ozod va jahondagi ilg’or davlatlar safida ko’rish orzusi bilan yashadi. Ko’p yillar ta’qibda, qamoqda, quvg’inlikda yurgan bo’lsa-da, mustabid tuzumning qiynoqlariga bardosh berib, qat’iyatli maqsadidan

² Sog’uniy A. Tarixi Muhammadiy. 1-kitob. - T.: Sharq, 2003. - B.3.

³ Shokirov U. Alixantura Soguni. – T.: Muharrir. 2013. – C.12.

qaytmadi. Faoliyatini, ijodini, kuch-g'ayratini xalqni uyg'otish, ma'rifatli qilish, shu orqali istibdod zanjiridan xalos bo'lishga bag'ishladi.

“Turkiston qayg'usi” kitobida ijtimoiy-siyosiy, ma'naviy-ma'rifiy qarashlarini ifodalab, eng og'ir qiynoq – mustamlakachilikdan xalos bo'lish yo'llarini o'rta tashlaydi. O'zbek xalqining betakror madaniyati, mustahkam dini, tili, turmush tarzi, xonliklar davridagi qoloqlik va uning sabablari, Turkistonning Rossiya manfaatlariga tortilishi, Turkiston muxtoriyati, istiqloлча harakati, bolsheviklar ofati, kommunistlarning milliy siyosati fojialari muallif nigohidan o'tkaziladi. Ko'pgina tarixiy jarayonlarning tahlilini keltirar ekan, shaxs ma'naviyatining mamlakat taqdiridagi hal qiluvchi kuchini ko'rsatishga harakat qiladi⁴.

Alixonto'ra Sog'unliy O'rta Osiyoni alohida geosiyosiy yaxlitlikda tasavvur qiladi. Ammo Turkiston zaminining Chor Rossiyasi tomonidan ishg'ol qilinganini achinish bilan tahlil etib, Vatanimiz hududida somoniylar, qoraxoniylar, temuriylar singari qudratli davlatlarni barpo etgan sulolalar va siyosiy yetakchilar faoliyatiga ham to'xtalib o'tadi. Bu bilan mamlakatimiz hududi buyuk sulolalarni boshidan o'tkazgani, tarixiy buyuklikka daxldor ekanligini va shunga mos voris bo'lish lozimligini ta'kidlaydi. Milliy-hududiy chegaralanish natijasida hosil bo'lgan yasama “iston”lar ruslarning mustamlakachiligi asorati – mamlakatni parchalash va kuchsizlantirish, yaxlit hududda ro'y bergan tarixiy jarayondan uzib qo'yish deb tushunadi.

Davlatning xorlikka tushib qolmasligi uchun mudofaa qudratini oshirish lozimligini ta'kidlab, bu mudofaa davlatning qurol-yarog'i, ya'ni harbiy salohiyati hamda xalqning ma'naviy salohiyatidan iborat ekanini uqtirib o'tadi. Bunday mudofaaga hozirlik ko'rilmasa, inson huquqlari va manfaatlari oyoq osti qilinadi va millatning kelajagi shubha ostida qoladi. Chunki: “Ongi ochilmagan, bilimsiz bir millat o'z dushmanlari oldida kushxonaga haydalayotgan bir to'p hayvondan hech qanday ayirmasi yo'qdir. Insonning o'ziga eng yaqin halokatlik dushmani ongsizlik va

⁴ Ahmedov T. Alixonto'ra Sog'unliy qarashlari davlat salohiyatining omili. www.daryo.uz

ilmsizlikdir”⁵. Shu bois millat har qanday sharoitda davlat yaxlitligini saqlash, yetakchi davlatga aylanishi uchun harbiy va ilmiy mudofaaga hozirlik ko’rishi zarur bo’ladi.

Bu jarayon Alixonto’ra Sog’uniyni qattiq iztirobga soladi: “Bolsheviklar hokimiyati qurilgan kundan boshlaboq, diniy marosimlarimizni asosi bilan yo’qotishga kirishganlikdan hozirgi bolalarimizning diniy hissiyotlari yo’q hisobida qolmishdur. Buning ustiga yana o’z ona tillaridan ham ajrar ekanlar, u chog’da diniy va milliy hissiyotlar butunlay yo’qolib, ko’p uzoqlamayoq ruslarga yutilib ketishlari shubhasizdir”⁶.

Bu haqda Alixonto’ra Sog’uniy: “Dinsizlik tufayli o’g’irlik, odob-axloqsizlik, bir-biriga hurmatsizlik, vijdotsizlik ko’paydi. Hozirgi madaniyat davrida diyonat bilan taraqqiyot birga yasholmaydi, degan xato fikr oqillar oldida emas, jahon bo’yicha johillar orasida tarqalmishdur. Haqiqatda esa, din poklikdur. Poklikka qurilgan axloqdur. Dinimizning asli aqldur, quroli ilmdur”⁷, - deb yozadi. Demak, dinni asl mohiyati bilan tushunish axloqimizga, odatlarimizga ta’sir etib, shaxsni yomon illatlardan saqlaydi.

Alixonto’raning so’nggi o’ttiz yillik umri Toshkentda o’tdi. Siyosiy ishlardan majburiy ravishda chetlashtirilgan bo’lsa-da, ilmiy, ijodiy va ijtimoiy faoliyatni sobitqadamlik bilan davom ettirdi.

Alixonto’ra Sog’uniy tom ma’nodagi olim inson edi. Alixonto’ra faqatgina ajoyib she’r-u dostonlar yozibgina qolmay, balki ko’p millionli Sharqiy Turkistonni mazlumlikdan ozod qilish harakatiga sardor ham edi. Bu harakat mag’lubiyat bilan yakunlangach, qonxo’rlar iskanjasiga tushib, Stalinning o’limigacha uy qamog’ida

⁵ Sog’uniy A. Turkiston qayg’usi. - T.: Alixonto’ra Sog’uniy, 2023. - B.51.

⁶ O’sha manba. - B.71.

⁷ Sog’uniy A. Turkiston qayg’usi. - T.: Alixonto’ra Sog’uniy, 2023. - B.97.

bo'ldi, lekin o'z e'tiqodiga sodiq qoldi. Marksizmni o'ziga tumor qilib olib aldangan ko'plab ziyolilar kabi og'ishmadi. KGBning doimiy nazoratida bo'lsada, 1960 yilda Buyuk Temur haqida she'r yozib, uni avlodlarga qoldirib ketgan. "Temur tuzuklari tarjimonidan" deb shartli sarlavha qo'yilgan she'r: *"Temurdek jahonda kishi o'tmadi, Aningdek o'g'ilni ona tug'madi"* satrlari bilan boshlanadi. Alixonto'ra jasoratli fikr egasi – birinchi bo'lib Amir Temur haqidagi haqiqatni qo'rqmay ochiq aytgan. Uning qonxo'r emas, insonparvar, odil bo'lganini va johil emas, aksincha, oqil va fozil jahongir bo'lganini dalillar bilan isbotladi.

Alixonto'ra Sog'uniiy 1962 yildayoq ulug' sohibqiron Amir Temurning "Temur tuzuklari"ni eski forsiydan o'zbek tiliga tarjima qiladi. Dastlab "Guliston" oynomasi sahifasida bu kitobning ko'p qismi 1967 yili u kishining jur'atli kirish so'zi bilan bosilib chiqadi⁸.

"Har bir davlat rahbari, podshosi agar "Temur tuzuklari"dan mukammal xabardor bo'lsa va unga amal qilsa, u eng odil, eng qudratli va yengilmas davlat podshosi bo'lishi muqarrar", degandi Sog'uniiy.

Yuqorida qayd etilganlardan tashqari, yana bir asari - "Shifo ul-ilal" ("Kasalliklar davosi") sharq tabobatidagi ko'p yillik tajribasi asosida yozilgan. "Shifo ul-ilal", ya'ni "Kasalliklar davosi" deb atalgan nodir tibbiy asarida 200 ga yaqin kasalliklarni muolaja qilishning tajribadan o'tgan usullari tushunarli tilda mufassal yoritilgan. Sariq kasalining yigirma uch turi mavjud bo'lib, shundan 22 tasiga shifo bor, ko'p hollarda esa qolgan bittasiga ham shifo bor ekan.

Alixonto'ra Sog'uniiy mojar olimi Hyerman Vamberining "Buxoro yoxud Movarounnahr tarixi" asarini usmonli turkchadan o'zbekchaga, Darveshali Changiyning "Musiq risolasi", Ahmad Donishning "Navodir-ul vaqoye" kitobini forsha-tojikchadan tarix fanlari nomzodi, dotsent Abdurahmon Hamroyev

⁸ Temur tuzuklari. //Guliston jurnali, 1967.

hamkorligida tarjima qilgan. Kitob “Fan” nashriyoti tomonidan 1964 yilda chop qilingan⁹.

XULOSA

Alixonto'ra Sog'unliy xuddi jadidchilar singari xalqni ilm-ma'rifatli, diyonatli bo'lishga va milliy o'zlikdan uzoqlashmaslikka chaqirdi. Ona Vatanini ozod ko'rishni istadi. Davlatni rivojlantirish, mustaqillikni saqlab qolishda xalqning milliy-ma'naviy holati, diniy qarashlari hamda siyosiy yaxlitligi muhim o'rin tutishini jiddiy tahlil qildi. “Turkiston qayg'usi” asarida bizning xalqimiz qanday qilib bosqinchilarga qul bo'lib qolgani va qanday qilib dinni, Vatanni, millatni asrash kerakligini chuqur siyosiy-ijtimoiy mantiq asosida mukammal bayon etib berdi.

Alixonto'ra Sog'unliy tengi yo'q notiq bo'lib, so'zlaganida nuroniy yuzidan mudom nur taralib turar, birorta ham keraksiz so'z ishlatmasdi. So'zlashdan oldin biroz sukutga ketardi, so'ng ohista so'z boshlab, o'qdek chaqnab chiqib, qalblarga malhamdek o'rnashadigan so'zlari-yu, qamrovi olam-jahon fikrlari bilan barchani o'zlariga maftun etardi.

Alixonto'ra Sog'unliy ana shunday, Ozodlik, Vatan va millat farzandi ediki, o'zi bashorat qilib ancha yillar burun aytgan gapi hozirgi kunda amalga oshmoqda. Ozodlikka erishgan O'zbekistonimizni va boshqa ozod Turkiston xalqlarini ko'rib quvongan bo'lar edi.

FOYDALANILGAN ADABIYOTLAR

1. Alixonto'ra Sog'unliy. Tarixi Muhammadiy. 1-kitob. -T.: Sharq, 2003.
2. Alixonto'ra Sog'unliy. Turkiston qayg'usi. - T.: Alixonto'ra Sog'unliy, 2023.
3. Shokirov U. Alixantura Soguni. –T.: Muharrir, 2013.

⁹ Xo'jamberdiyev Y. Sog'unliy. T.: Sharq. - B.362.

4. Ahmedov T. Alixonto‘ra Sog‘uniy qarashlari davlat salohiyatining omili.
www.daryo.uz
5. Temur tuzuklari //Guliston jurnali, 1967.
6. Alixonto‘ra Sog‘uniy. Shifo-ul-ilal. (Kasalliklar davosi) //Sharq yulduzi, 6-son, 1996.
7. Alixonto‘ra Sog‘uniy (tarj.). Herman Vamberi. Buxoro yoxud Movarounnahr tarixi.
- T.: 1990.
8. Xo‘jamberdiyev Yo. Sog‘uniy. - T.: Sharq, 2018.